

求恕齋
叢書

雪橋詩話餘集

四

I207.
443.

一、
 二、
 三、
 四、
 五、
 六、
 七、
 八、
 九、
 十、

雪橋詩話餘集卷第四

遼陽楊鍾義撰集

吳興劉承幹參校

世宗藩邸在皇城東北登極後命名曰雍和宮圓明園在挂甲屯之北距暢春園里許爲潛邸賜園之名圓明園長春仙館則高宗爲皇子時賜居地後以迎奉

孝聖憲皇后爲膳寢之所者也高宗爲皇子所居卽

今之重華宮宮前爲崇政殿卽樂善堂東廡爲古香齋西廡曰抑齋卽位後凡園亭行館有可靜憩觀書者率以抑齋爲額御製詩有云祇有抑然志庶幾如武公

雍正中 孝恭仁皇后之喪有漢軍佐領李斯琦以二
十七日後髻髮擬斬監候旋釋之乾隆戊辰錢唐金質
夫知錦州值 孝賢純皇后之喪於二十七日後髻髮
質夫故翰林素不禮同城旗員於是防禦某訐之於副
都統副都統亦故憾之遂以聞被逮擬大辟袁存齋過
保陽詩江南哀庾信僮耳老東坡白刃餘生健青雲舊
夢多小窗重翦燭大海早揚波莫靳醕醪飲蛟龍脫網
羅爲質夫作也自國初以來遭 帝后之喪惟京官百
日不髻頭以有百日與祭之禮也外官無論滿漢大小
皆二十七日釋服卽髻頭至是定制 國恤百日内髻

頭者立斬載入會典律例當質夫獄上時盛大司寇安
爲左都御史獨不肯署牘諸大臣強之始署及長刑部
召見日言金文滄之鬚頭沿漢人故習耳且先請之上
官而後鬚情可恕 高宗首肯之及欲改擬斬候同官
恐獲罪持不可久之或爲蜚語聞召詰之力援李斯琦
例爲請 上大怒下之獄論斬監候戍其子喀通阿於
熱河披甲同時逮問者南河總督周學健湖廣總督塞
楞額學健尋與質夫同發直隸罰修城工而塞楞額賜
自盡嗣學健以贓私仍下獄賜自盡而湖北巡撫彭樹
葵湖南巡撫楊錫紱以順從總督薄其罪且先請檢舉

免修城

吳敬梓敏軒老伶行贈八十七叟王甯仲云 聖皇峻
德如雲日赤雁歌成白麟出游河巡洛邁唐虞御宇昇
平六十一乘輿六度幸江南貝葉三花華蓋含句陳列
宿湛盧劍陪輦詞人玳瑁簪駐蹕金陵佳麗地舊京憑
弔思明季樂舞雩門祭孝陵行宮夜半喧歌吹中有伶
工最少年歌喉百轉 聖人前幽咽如聞隴頭水嘈切
琵琶四十絃忽然靈威歌天馬行雲自止塵飛下宮女
私驚聲繞梁侍臣共見顏如赭 君王親顧賜纏頭中
使攜來寵渥優幾日鑾輿渡江去從茲鞠部姓名留鞠

部從茲羨榮遇秦青咸黑都相妬下里喧傳郢市歌何
人敢學邯鄲步本朝家法重明良偶爾伶工一擅場新
磨安敢呼天下幡綽焉能侍上皇鼎湖龍去曾偷泣當
日御階看鵠立夢裏猶聞天語呼潦倒梨園自於邑
潦倒梨園五十年蕭蕭白髮暮江邊誅茅自搆三間屋
種秫新營二頃田蒔花插竹時酣酒往事追思重回首
濃綠參差盼帝梧嫩黃搖曳瞻堯柳有時乘興入豪家
忻看綽板閒箏琶不知匿笑緣何事爲道流涎逢麴車
今年城北花朝會鷓鴣拉雜紛無賴四座都爲失意人
老伶闌入歡聲大銀燭重燒眼倍明蹣跚兩足不成行

參軍邦老新裝就緩步氍毹歌一聲一聲歌罷羣稱善
都緣曾侍瑤池宴似從天上謫人間屈指流年若飛電
我語老伶聲勿吞曾受 君王賜予恩才人多少淩雲
賦白首何曾獻至尊酒闌燭跋笙歌歇行到板橋珍重
別曾見當年歌舞誰秦淮流水鍾山月乾隆初無錫吳
蒙泉官上元廣文與敏軒唱酬爲題老伶行後云崔九
堂前一曲歌落花時節柰君何白頭應記昇平樂廿載
江南望幸多零落才人獻賦遲興酣翻出老伶詩良辰
好貰旗亭酒賭取黃河遠上詞

繆禮南司寇姚亭卽事和鄂宮詹韵云文窗窈窕日初

斜蘚色侵階徑覆莎曾是 先皇巡幸地茅茨不翦露
雲芽月地雲階想像行宮車去後草還生秋花一朵殷
紅色苑樹龍蔥不記名山色溪光清淨身白頭宮監意
相親峰腰指點紅蕤草黃幄中閒坐 聖人嗚咽泉聲
繞曲臺鼎湖龍去有餘哀小臣親灑橋山淚獨抱遺弓
首重回鄂宮詹卽復菴司農爲文端介弟雅頌集祇錄
其 聖武遠揚平定青海詩八首原作不可見矣錢集
齋尙書恭輓 聖祖仁皇帝四首云列宿長環太乙宮
忽驚斗極坼天中九韶搏拊留儀鳳萬國衣冠泣有熊
擊壤不知雲影暗授時忍見日華空一封遺詔傳中外

淚灑冰天率土同繼業功同創業多坐麾貔虎定山河
穴中窮寇俘元濟徼外蠻荒下伏波妖鳥盡時驚玉弩
長鯨翦後止天戈遺弓在抱思神武回首軒臺涕泗沱
蠲租給復主恩深重道崇儒識 聖心雲漢作人文壽

考豆登肇祀 帝居歆更無鴻雁鳴中澤只有鵷鸞萃

上林臣亦湖邊親從者攀髯流慟最難禁帝車環指運
無窮父老年年望六龍曾仰翠華瞻舜帝最憐縞素哭
仁宗望祈已咽通神鼓陟降疑聞警夜鐘六十一年寬

大政漢唐奕代總難逢

高宗有御製遙亭行宮
對雨詩姚亭蓋卽遙亭

世宗憲皇帝遺詔云凡各衙門條例有從前本嚴而朕

改易從寬者此從前部臣定議未協朕與廷臣悉心斟酌而後更定以垂永久者也應照更定之例行若從前之例本寬而朕改易從嚴者此乃整飭人心風俗之計原欲暫行於一時俟諸弊革除之後仍可酌復舊章此朕本意也向後遇此等事則再加斟酌若有應照舊例者仍照舊例行錢文端恭輓四首之二云正位當陽日憂勤念八荒商書宜駿厲周禮最精詳天意原仁愛王權有弛張畏神兼服教千載憶軒皇爲足窺見體仁長人之本旨矣

高郵殷樊桐以明經貢太學丁酉京闈名在副車籍天

長曾一出爲吏誠樸不與吏習諧不克久於官生順治
庚子乾隆壬戌尙健在詩如隱峰菴云一半屋依山作
壁兩三僧與佛同龕毘尼菴云小閣一燈當佛面短簾
三尺及人肩同李北岳羅玉行泛舟城南云拍隄野水
碧見底迎面沙禽飛趁人癸酉冬老母誕辰云愁深倚
杖看孤影悔甚生男志四方北固菴云墮地風枝吹老
樹過橋僧影杖枯藜荅李北岳云愁非幾卷書能遣嬾
到經旬髮不梳初冬感懷云少睡事從疇昔數善忘書
定再三看喜得南歸云眉占黃色今纔準鏡驗蒼顏月
不同讀史云賦得郊居筆最工官階苦只望儀同坐中

腸斷齊宮伎偏識前朝沈侍中甘泉山下卽目云盤古
祠前落葉多晚風吹處水微波秋槐一路蟬聲寂看戲
野塘雙白鵝卽事云竹屋深深枳樹籬風簾少上有上鉤
時落花黏地燕泥溼筍破綠苔人未知夏氏味堂稱其
寫情狀事冲秀有不盡之旨非鄉黨之阿好也

果毅親王善肇窠大書兼能繪事解州漢漢壽亭侯廟
有所畫侯像吳胥石詩畫圖展縹軸標識自宗潢生面
開千古英風照八荒規模殊慘淡點染入微茫可想見
其能事蔡時豫有次南星店果親王壁上畫松歌

曹謬廷代挽怡親王句云八字褒無忝千秋痛最慙雍

正四年 御書忠誠敬直勤慎廉明八字以賜以八年
五月薨

平敏郡王夙工文翰所著九河考三老五更辨京房考
功課吏論卦圖先後天論可以韻頗濟齋平視敬亭徐
恕齋讀中祕書興有縞紵之契嘗以吳仲圭山水貽恕
齋平邸故後恕齋題三絕句云芳韻泠泠拂澗阿千金
敝帚未爲多寒山枯木渾無恙回首朱門已逝波何限
人琴欲愴神玉魚金椀葬嶙峋梁園賓從風流杳水墨
空留梅道人小樓寒雨暝煙昏讀畫還將逸品論敢忘
零紈持贈意酒闌重說信陵恩

慎靖郡王送板橋鄭變爲范縣令云萬丈才華繡不如
銅章新拜五雲書朝廷今得鳴琴牧江漢應問問字居
四廓桃花春雨後一缸竹葉夜涼初屋梁落月吟瓊樹
驛遞詩筒莫遺疏又題其詩鈔云高人妙義不求解充
腸朽腐同魚蟹此情今古誰復知疏鑿混沌驚眞宰振
枯伐萌陳厥粗浸淫漁畋無不無按拍遙傳月殿曲走
盤亂瀉蛟宮珠十載相知皆道路夜深把卷吟秋屋明
眸不識烏雌雄妄與盲人辨烏鵲果恭親王稱其被服
寒素左右圖書多延接四方之士其紫瓊巖詩鈔爲幕
客顧元揆所定書而刻之蓋比於林吉人之書漁洋精

華錄王旣薨無子 高宗命質莊親王爲之後乾隆癸卯質邸哀其餘橐爲續刻焉質邸九思堂詩鈔落花句云婪尾忽驚沈醉後遨頭須趁妙歌前簾疏偶趁繡書過徑僻時留印屐稀沈郎瘦憶梅風韻老可閒參竹性情皆見清疏錢鐸石題其畫卷云早聞設有嘉賓醴比想藏多善本書定郡王亦工畫鐸石奉題清漣晚汎圖云被服詩書儒者術光明孝友 聖人孫蓋定安親王子也

浙中詩派多宗樊榭山民往往繪圖祀之所著遼史拾遺東城雜記爲汪小米所校刊詩編自甲午與宋詩紀

事版舊藏黃鄉泉家貌瘦人呼瘦厲舊居傍南湖自號
南湖花隱移居東城卒年六十二葬於西溪王家陽母
夫人墓之側嘉慶閒阮文達補題墓碑余慈柏諸人鳩
置墓田屬交蘆菴僧春秋致祭吳穀人作墓田記栗主
向供武林門外牙灣黃山谷祠中姬人朱月上主祔祀
王述菴撰楹聯云丈室華同天女散摩圍詩共老人參
道光戊子春趙雱門蔡木龕李西齋遷奉栗主於交蘆
菴之塔院中爲先生右則月上主胡書農作記一首惟先
生蔣夫人之主不知所在蓋厲氏木主皆被毀先生主
爲丁龍泓書月上主爲先生自書以名筆親題獲存焉